



Sumáriu Kazu
Tribunál Judisiál Primeira Instáncia Dili
Juñu 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Dili

1. Totál kazu ne'ebé JSMP monitoriza: 8

Artigu	Tipu Kazu	Númeru
Artigu 145 Kódigo Penál (KP), konjuga ho artigu 2, 3, 35(b) no 36 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika no tipu ilísitu sira kona-ba violénsia doméstika	3
Artigu 154 KP	Maus-tratus ba kónjuje	2
Artigu 207 KP no Artigu 148 KP	Kondusaun sein karta no ofensa ba integridade física negligente.	1
Artigu 267 KP	Burla agravada	1
Artigu 211 (1 no 3) KP	Arma proibida	1
Totál		8

2. Totál desizaun ne'ebé JSMP monitoriza: 8

Tipu pena	Artigu	Númeru
Suspensaun ba prizaun nia ezekusaun	68 KP	3
Absolve		2
Multa	67 KP	1
Admoestasaun	82 KP	2

Totál		8
--------------	--	----------

3. Totál kazu sira ne'ebé adia tuir JSMP nia monitorizasaun: 0

4. Totál kazu sira ne'ebé sei kontinua prosesu tuir JSMP nia monitorizasaun:0

B. Deskrisaun sumáriu julgamentu ba desizaun kazu sira

1. Krime ofensa ba integridade física simples ho natureza violénsia doméstika

Nu. Prosesu : 0042/22.LILIQ
 Kompozisaun Tribunál : Singulár
 Juís : Dra. Ersilia De Jesus
 Prokuradór : Dr. Luis Hernani Rangel da Cruz
 Defesa : Dr. Francisco Caitano.
 Desizaun : Pena admoestasaun

Iha 02 Juñu 2023, Tribunál Judisiál Primeira Instánsia Dili prezide julgamentu leitura sentensa ba krime ofensa ba integridade física simples ho natureza violénsia doméstika ne'ebe envolve arguidu Tobias dos Santos Sampaio hasoru nia feen, iha Munisípiu Likisá.

Akuzasaun prokuradór

Prokuradór akuza katak iha 27 Juñu 2022, iha oras tuku 09:00 dadeer, arguidu buti ho maka'as iha lezada nia kakorok hodi dulas rezulta lezada sofre moras. Antes agresaun ne'e, arguidu ho lezada diskute malu kona-ba lezada ba uma atu foti labarik sira nia dokumentu, maibé odamatan uma nian xave hela, nune'e lezada selok de'it odamatan hodi tama ba uma laran, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklarata katak foin primeiravés mai hatan iha tribunál, arrepende ona nia hahalok no deklarata mós katak hafoin akontesimentu ne'e, arguidu husu ona diskulpa ba lezada no agora dadaun nafatin moris hamutuk hanesan feen ho la'en.

Alende ne'e lezada kontiua konfirma faktu hotu iha akuzasaun no deklarata katak di'ak malu ona ho arguidu no agora dadaun moris hamutuk nafatin hanesan feen ho la'en.

Alegasaun finál

Prokuradór konsidera faktu hotu provadu bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuru husu ba tribunál atu kondena arguidu ho pena multa.

Entretantu defeza iha nia alegasaun husu ba tribunál atu fó pena admoestasaun ba arguidu ho razaun arguidu konfesa, arrepende nia hahalok no di'ak malu ona ho lezada. Alende ne'e arguidu mak iha responsabilidade ekonomia ba nia família.

Desizaun

Depoizde avalia faktu hotu tribunál prova katak arguidu buti lezada nia kakorok rezulta moras iha lezada nia kakorok.

Bazeia ba faktu no prova sira no tetu mós ho sirkunstánsia atenuante sira hanesan arguidu konfesa, arrepende nia hahalok no di'ak malu ona ho lezada, nune'e tribunál konklui prosesu ne'e no kondena arguidu ho pena admoestasau.

2. Krime ofensa ba integridade fizika simples ho natureza violénsia doméstika

Nú. Prosesu : 0331/22.PCCIC
Kompozisaun Tribunál : Singulár
Juís : Dra. Ersilia De Jesus
Prokuradór : Dr. Napoleão da Silva
Defeza : Dr. Henrique João Mariz
Desizaun : Pena prizaun fulan 2 suspende ba tinan 1

Iha 16 Juñu 2023, Tribunál Judisiál Primeira Instánsia Dili prezide leitura sentensa ba krime ofensa ba integridade física simples ho natureza violénsia doméstika ne'ebe envolve arguidu JFAC hasoru nia feen, iha Munisípiu Dili.

Akuzasaun prokuradór

Prokuradór akuza katak iha 21 Jullu 2022, iha oras tuku 00:30 madrugada, arguidu tebe dala ida ho maka'as iha lezada nia konotak no tuku dala rua ho maka'as iha lezada nia reen-toos rezulta lezada monu ba rai, arguidu kontinua tuku dala barak iha lezada nia matan laran parte loos no karuk no tuku dala rua iha lezada niaibun kulit parte karuk iha akontesementu ne'e lezada grávida hela fulan ualu. Antes agresaun ne'e, arguidu ho lezada diskute malu kona-ba lezada la prepara hahan kalan nian, ho nune'e mosu agresaun ne'e. Konsekuensia husi agresaun ne'e lezada hetan moras maka'as iha kanotak no moras maka'as iha reen-toos, bubu no kafuak bo'ot iha reen-toos, oin nakukun hodi monu ba rai, liman sorin loos hetan kanek, moras maka'as, bubu no metan iha matan laran sorin loos no sorin karuk no lezada konsege ba halo tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak foin primeiravés mai hatan iha tribunál, arrepende nia hahalok no hafoin akontesimentu ne'e, arguidu husu ona deskulpa ba lezada no fó ona osan ho valor US\$50.00 ho bir bintang dos ida ba lezada nia família no agora dadaun nafatin moris hamutuk hanesan feen ho la'en.

Alende ne'e, lezada kontinua konfirma faktu hotu iha akuzasaun no deklara katak di'ak malu ona ho arguidu no agora dadaun moris hamutuk nafatin hanesan feen ho la'en.

Alegasaun finál

Iha alegasaun, prokuradór konsidera faktu hotu iha akuzasaun provadu bazeia ba konfisaun arguidu nian no konfirma mós husi lezada no atu prevene krime hanesan akontese tan iha futuru, husu ba tribunál atu kondena arguidu ho pena multa.

Entretantu defeza husu ba tribunál atu fó pena admoestasaun ba arguidu ho konsiderasaun katak arguidu husu ona deskulpa ba lezada fó ona US\$50.00 no bir bintang dos 1 (ida) ba lezada nia família tuir kustume Timor nian, arguidu konfesa, arrepende nia hahalok no foin primeravéz mai hatan iha tribunál, alende ne'e arguidu mak responsavel ba nia família.

Desizaun

Depoisde avalia faktu hotu tribunál prova katak arguidu tebe dala ida ho maka'as iha lezada nia konotak no tuku dala rua ho maka'as iha lezada nia reen-toos rezulta lezada monu ba rai, arguidu kontinua tuku dala barak iha lezada nia matan laran parte loos no karuk no tuku dala rua iha lezada niaibun kulit parte karuk.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan rua suspende ba tinan ida.

3. Krime kondusaun sein karta no ofensa ba integridade negligente

Nú. Prosesu : 0003/21.ALSTR
Kompozisaun Tribunál : Singulár
Juís : Dr. Ivan Patrocínio Antonino Gonçalves
Prokuradór : Dr. Ozorio de Deus
Defeza : Dr. José Guterres
Desizaun : Pena multa US\$100.00

Iha 23 Juñu 2023 Tribunál Judisiál Primeira Instánsa Dili liuhusi julgamentu movel iha Munisípiu Aileu prezide julgamentu ba krime kondusaun sein karta no ofensa ba integridade negligente ne'ebé envolve arguidu Angelito Roberto Carlos hasoru lezada Afina da Costa, iha Munisípiu Aileu.

Akuzasaun prokuradór

Prokuradór akuza katak iha 4 Novembru 2021, iha oras tuku 20:00 kalan, lezada hamutuk ho ninia katuas oan lao iha estrada parte Eskola Cafe Aileu nian oin iha jebra cruz lezada ho nia laen atravesa dalan iha jebra cros nian, bainhira lezada atu to'o iha estrada ninin atu hakat sae ba trotoar derepente arguidu ho ninia motor halai ho velocidade maka'as ho kondisaun motor nia lampu mós la lakan hodi soke kona iha lezada nia liman rezulta lezada monu tun ba rai hodi hetan kanek iha liman parte loos, oin metan, bubu no kabaas naksalak. Bainhira arguidu soke tiha lezada, arguidu foti motor hodi halai tiha husi fatin akontesimentu.

Prokuradór akuza arguidu kontra artigu 207 KP kona-ba kondusaun sein karta ho moldura penál too tinan 2 ka multa no artigu 148 kona-ba ofensa ba integridade fízika negligente ho

moldura penál too tinan 1 ka multa.

Produsaun ba prova sira

Iha prosesu julgamentum, arguidu konfensa integralmente ba faktu hotu iha akuzasaun, rekoñese ninia hahalok sira no deklara katak antes ne'e nia hakarak rezolve ho lezada nia família maibé lezada ho ninia la'en lakohi rezolve tuir família. Arguidu deklara mós katak nia seidauk halo karta kondusaun tanba seidauk iha Elitorál no agora arguidu foin atu halo karta kondusaun.

Alende ne'e lezada kontinua konfirma ho akuzasaun no konfirma mós katak lezada halo tratamentu durante fulan lima resin hodi gasta osan lubuk ida. Lezada mós konfirma katak depoisde akontesimentu arguidu ho ninia família ba buka hodi rezolve maibé lezada ho ninia la'en deside hodi kontinua prosesu kazu ne'e tuir sistema justísa formál nian.

Tribunál deside presinde testemuña tanba arguidu konfesa integralmente ba faktu sira ne'ebé akuza ba nia no konfirma mós husi lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirma mós husi lezada, mezmú nune'e arguidu tenke selu indemnizasaun sivíl ba lezada ne'ebé sofre moras durante fulan barak nomós gasta osan ba halo tratamentu no viagen ba mai, nune'e husu ba tribunál atu kondena arguidu ho pena prizaun tinan rua suspende ba tinan rua.

Defeza husu ba tribunál atu kondena arguidu ho pena multa tanba arguidu konfesa ba faktu sira, arrepende nia hahalok, arguidu dependénsia ekonomia ba inan Aman no arguidu nia idade mós seidauk to'o atu trata karta kondusaun tanba kritériu sira ne'ebé presija hanesan kartaun eleitoral ne'ebé arguidu seidauk iha. Arguidu promete perante tribunál katak sei trata karta kondusaun depois de prosesu ida ne'e.

Desizaun

Depoisde avalia faktu sira hotu tribunál prova katak arguidu provadu komete krime hasoru lezada.

Bazeia ba faktu provadu hirak ne'e no tetu mós ho sirkunstánsia atenunte sira hanesan arguidu konfesa no arrepende ona nia hahalok, arguidu mós promete sei trata ninia karta kondusaun. Nune'e tribunál konklui prosesu ne'e no kondena arguidu ho pena multa US\$100.00 ne'ebé arguidu sei selu US\$1.00 kada loraun, durante loraun 100. Tribunál mós fiksa pena alternativa durante loraun 60 prizaun, bainhira arguidu la kumpri pena multa refere no selu mós indemnizasaun sivíl ba lezada ho montante US\$800.00.

4. Krime burla agravada

Nú. Prosesu : 0010/13.PNSIC

Kompozisaun Tribunál : Koletivu

Juís : Dr. Jose Gonçalves, Dr. Alvaro Freitas no
Dr. Argentino Nunes

Prokuradór : Dr. Claudino do Rosario
Defeza : Dr. João de Carvalho
Desizaun : Absolve

Iha 23 Juñu 2023, Tribunál Judisiál Primeria Instánsia Dili prezide leitura akordaun ba krime burla agravadu ne'ebé envolve arguidu Armando Ximenes, Avelina Agostinho no Lounginhos dos Reis hasoru lezadu Sutoyo, iha Munisípiu Dili.

Akuzasaun prokuradór

Prokuradór akuza katak iha 25 Setembru 2012, arguidu Longuinhos no Avelina ba iha lezadu Sutoyo nia Dealer Altanik Motor iha Hudi Laran Dili, ne'ebé foin loke, hodi bolu lezadu ba iha kompañia auto Motor Delta Comoro.

Iha ne'eba arguidu sira koalia atu serbisu hamutuk ho lezadu nia kompañia ne'ebé fa'an motor, arguidu sira husu motor nia folin hira no lezadu hatan kada motor ho marka Tiger 2000 ho folin US \$2,550 (Dois Mil Quinhentos e Cinquenta).

Ho nune'e arguidu Armando Ximenes no Avelina husu ba lezadu iha motor hira no lezadu hatan nia motor Tiger iha unidade 15 maka agora iha Dealer Atlantic ne'ebé ho nia valór total US\$38,550,00.

Arguidu Armando hatan atu foti hotu motor 15 refere, nune'e iha lokraik arguida Avelina ba iha lezadu nia dealer iha hudi laran atu foti motor Tiger 15 ne'e, maibé lezadu hatan katak labele lai, tenke selu kedas lai mak bele foti. Tanba lezadu ejizi atu selu kedas, nune'e arguida entrega chek ho Nú."0009218" ba lezadu ne'ebé iha chek ne'e iha osan ho montante US \$38,550,00 ne'ebé asina husi arguido Armando Ximenes, maibé bainhira lezadu lori Chek refere ba iha banku Mandiri atu foti osan, funsionário banku Mandiri informa katak Chek ne'e mamuk (kosong) laiha osan.

Lezadu kontaktu liu husi via telephone ba arguida Avelina no arguida Avelina informa ba lezadu katak osan millaun Sanulu foin haruka ba estranjéiru. Tanba arguidu sira bosok bei-beik, tuir mai lezadu husu halo karta akordu iha lora 03/10/2012, ne'ebé sira deklaratu selu osan ho montante US\$43.950.00. Ne'ebé faze dahuluk atu selu iha lora 27/10/2012 ho osan US \$16.975.00 no faze daruak atu selu iha lora 03/11/2012 ho valor US\$26.975.00. (Surat deklarasaun fls12).

Lezadu la satisfaz no husu nafatin osan ba arguida Avelina ne'ebé hanesan tezoreira ba Kompañia Auto Motor, nune'e arguida haruka osan ho montante US\$2,300.00 Hanesan faze primeiru ba lezadu nia konta bankaria iha Banku Mandiri ho nú rekening: 601-0000052613-0 iha lora 04/10/2012. Iha lora 15 de Janeiro 2013, Arguidu Longuinhos dos Reis halo deklarasaun atu selu motor neen (6) ho prestasaun (cicilan) ba dala tolu, ne'ebé ho nia montante hamutuk US\$15,300 maibé iha realidade arguidu la selu osan refere.

Konsekuénsia husi arguidu/a sira nia hahalok sira iha leten, hanesan fó chek osan no akordu falsu halo lezadu lakon nia negosio hanesan fa'an motor tanba tenke taka nia loja no hein nia osan husi motor ne'ebé arguidu sira foti. Arguidu sira nia hahalok refere iha

leten prejudika tebes lezadu no halo lezadu nia situasaun ekonomia defisil.

Prokuradór akuza arguidu/a kontra artigu 267 KP kona-ba burla agravada ho moldura penál tinan 3 too tinan 10.

Produsaun ba prova sira

Iha prosesu julgamentu arguidu/a na'in tolu hili direitu nonook. Alende ne'e lezadu mós la marka prezensa iha prosesu julgamentu tanba la hetan lezadu nia paradeiru nune'e ministériu públiku maka reprezenta lezadu.

Alegasaun finál

Prokuradór haktuir katak iha prosesu julgamentu arguidu/a sira hili direitu nonook no laiha faktu aprovalu seluk hosi lezada tanba lezada mós la marka prezensa hodi hato'o ninia deklarasaun nune'e husu ba tribunál atu tetu no konklui prosesu ne'e hodi foti desizaun tuir konviksaun tribunál nian.

Entretantu parte defeza husu ba tribunál atu absolve arguidu sira tanba laiha faktu provadu ne'ebé deskobre durante prosesu julgamentu.

Desizaun

Depoisde avalia faktu hotu, tribunál prova katak arguidu sira hili direitu nonook nomós lezadu la marka prezensa iha audiénsia julgamentu maske tribunál tenta ho meius oioin hodi kontaktu lezadu, alende ne'e testemuña sira mós la konsege arola ho nune'e halo tribunál la konsege produs prova iha julgamentu, nune'e tribunál konklui prosesu ne'e no absolve arguidu sira husi krime ne'e.

5. Krime ofensa ba integridade física simples ho natureza violénsia doméstika

Nú. Prosesu : 0090/22.LIBZT
Kompozisaun Tribunál : Singulár
Juís : Dra. Ersilia De Jesus
Prokuradór : Dr. Napoleão da Silva
Defeza : Dr. Rosmenio Fatima (pessoa idonia)
Desizaun : Pena admoestasaun

Iha 23 Juñu 2023, Tribunál Judisiál Primeira Instánsia Dili prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu RG hasoru nia feen, iha Munisípiu Likisá.

Akuzasaun prokuradór

Prokuradór akuza katak iha 04 Setembru 2022, iha oras tuku 20:00 kalan, arguidu tuku dala ida iha lezada nia matan fukun parte karuk, rakut lezada nia kakorok no tebe dala ida iha lezada nia kotuk laran, konsekuensia husi arguidu nia hahalok ne'e rezulta lezada hetan moras iha nia matan fukun parte karuk, bubu no metan iha lezada nia matan fukun parte karuk no kanek riska iha kakorok. Kazu ne'e akontese bainhira arguidu husu tuir bebeik lezada kona-ba bir bintang lata rua no fanta lata ida ne'ebé família fó ba lezada atu

hemu maibé lezada la hemu no lori ba uma nune'e arguidu husu tuir bebeik dehan se mak fó nune'e sira diskuti malu no arguidu halo agresoun hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun no deklarata katak iha buat balun loos no buat balun la loos, ida la loos maka arguidu la tuku dala rua iha lezada nia matan fukun no iha akontesementu ne'e lezada atu monu mak arguidu tahan netik, nune'e arguidu nia liman kukun kona iha lezada nia kakorok rezulta kanek maibé laos ho intensaun hakarak rakut lezada. Arguidu deklarata foin primeiravéz mai hatan iha tribunál, arrepende nia hahalok no depoisde akontesimentu ne'e husu ona diskulpa ba lezada no agora dadaun nafatin moris hamutuk hanesan feen ho la'en.

Iha parte seluk, lezada konfirma faktu hotu iha akuzasaun no deklarata katak arguidu atu salva lezada mak arguidu nia liman kukun kona lezada nia kakorok, arguidu husu ona deskulpa no di'ak malu ona ho lezada.

Alegasaun finál

Prokuradór konsidera faktu hotu provadu, mezmú arguidu koko atu nega faktu balun, maibé lezada konfirma, nune'e husu ba tribunál atu kondena arguidu ho pena multa.

Enkuantu defeza haktuir katak arguidu deklarata de'it faktu ne'ebé nia komete, arrepende nia hahalok, di'ak malu ona ho lezada no foin primeiravés mai hatan iha tribunál, nune'e husu ba tribunál atu kondena arguidu ho pena ne'ebé justu.

Desizaun

Depoisde avalia faktu hotu tribunál prova katak arguidu tuku dala ida iha lezada nia matan fukun parte karuk, rakut lezada nia kakorok no tebe dala ida iha lezada nia kotuk laran, konsekuensia husi arguidu nia hahalok ne'e rezulta lezada hetan moras iha nia matan fukun parte karuk, bubu no metan iha lezada nia matan fukun parte karuk no kanek riska iha kakorok.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu arrepende, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena admoestasoun.

6. Krime maus-tratus ba kónjuje

Nú. Prosesu : 0079/21. DICMR

Kompozisaun Tribunál : Koletivu

Juís : Dr. Ivan José Antoninho Gonçalves, Dra. Ersilia de Jesus no Dra. Ana Paula Fonseca.

Prokuradór : Dr. Luis Hernani Rangel da Cruz

Defeza : Dr. Lino Lopes

Desizaun : Pena prizaun tinan 2 suspende ba tinan 2

Iha 26 Juñu 2023, Tribunál Judisíal Primeira Instánsia Dili prezide leitura akordaun ba krime maus tratus ba kónjuje ho natureza violénsia doméstika ne'ebé envolve arguidu AP hasoru nia feen, iha Munisípiu Dili.

Akuzasaun prokuradór

Prokuradór akuza katak iha 12 Feveireiru 2021, iha oras tuku 20:00 kalan, arguidu tuku dala rua iha lezada niaibun, tuku dala dala ida iha lezada nia kanuruk no tuku dala ida iha lezada nia kabun. Aktu ne'e rezulta lezada monu kedas ba rai, bainhira lezada monu hela iha rai, arguidu kontinua rasta lezada nia fuuk no kontinua tuku dala ida iha lezada nia tilun hun parte loos. Antes agresaun ne'e, arguidu ho lezada diskute malu kona-ba lezada husu osan atu sosa nesesidade uma laran nian, ho nune'e mosu agresaun ne'e. Arguidu nia aktu ne'e rezulta moras no bubu iha lezada niaibun, kanuruk, kabun, ulun no tilun-hun parte loos.

Antes ne'e iha loron no fulan ne'ebé la apura maibé iha tinan 2020, maizumenus iha oras tuku 20:00 kalan, arguidu tuku dala ida ho maka'as iha lezada nia kanuruk rezulta lezada sofre moras no oin nakukun. Antes agresaun ne'e, arguidu ho lezada diskute malu kona-ba arguidu ba foti osan ne'ebé maka ema deve hela la fó hatene ba lezada.

Iha loron no fulan ne'ebé la apura maibé nafatin iha tinan 2020, iha oras tuku 08:00 dadeer, arguidu basa dala rua iha lezada nia hasan parte loos, rezulta lezada sofre moras.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 too tinan 6.

Produsaun ba prova sira

Iha julgamentu arguidu konfesa integralmente ba faktu hotu iha akuzasaun no deklarata katak hafoin akontesimentu ne'e sira hela hamutuk nafatin iha uma ida, arrepende nia hahalok no promete sei la komete tan krime hanesan iha futuru.

Tribunál presindi lezada nia deklarasaun tanba arguidu konfesa totalmente ba faktu sira iha akuzasaun.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian, atu prevene krime ne'e akontese tan iha futuru husu ba tribunál atu kondena arguidu ho pena prizaun fulan neen suspende ba tinan ida.

Entretantu husu ba tribunál atu kondena arguidu ho pena ne'ebé kmaan ho konsiderasaun katak, arguidu konfesa, arrepende nia hahalok no di'ak malu ona ho lezada.

Desizaun

Depoisde avalia faktu hotu tribunál konsidera faktu hotu ne'ebé akuza ba arguidu provadu hotu. Bazeia ba faktu provadu hirak ne'e no tetu mós ho sirkunstánsia atenuante sira

hanesan arguidu konfesa, arrepende nia hahalok no di'ak malu ho lezada. Ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

7. Krime maus-tratus ba kónjuje

Nú. Prosesu : 0638/21.DICMR
Kompozisaun Tribunál : Koletivu
Juís : Dr. Ivan Antonino, Dra Ersilia de Jesus no Dra Ana Paula
Fonseca
Prokuradór : Dr. Napoleão Soares da Silva
Defeza : Dr. Marchal Mascarinhas
Desizaun : Pena prizaun tinan 2 suspende ba tinan 4 fulan 6

Iha 28 Juñu 2023, Tribunál Judisiál Primeria Instánsia Dili, prezide julgamentu leitura sentensa ba krime maus-tratus ba kónjuje ne'ebé envolve arguidu RF hasoru nia feen, iha Munisípiu Dili.

Akuzasaun prokuradór

Prokuradór akuza katak iha loron ne'ebé la apura maibé iha Agostu 2021, iha oras tuku 19:15 kalan, arguidu tuku dala tolu, iha lezada nia hasan parte loos no karuk no tolok lezada, arguidu nia aktu ne'e, rezulta lezada sofre moras maka'as iha hasan no mean iha lezada nia hasan parte karuk. Antes agresauun ne'e, arguidu ho lezada diskute malu kona-ba arguidu hemu hela tua ho ninia kolega sira lezada ba bolu arguidu atu fila ba uma, ho nune'e mosu agresauun ne'e.

Tuir mai iha loron ne'ebé la apura maibé iha Novembru 2021, iha oras tuku 15:30 lokraik, arguidu basa dala hat, iha lezada nia hasan parte loos no karuk no kontinua tolok lezada, arguidu nia aktu ne'e rezulta lezada sofre moras maka'as no mean iha lezada nia hasan parte loos no karuk, oin nakukun no tilun la konsege rona tiha. Antes agresauun ne'e, arguidu ho lezada konverse hela derepente arguidu komete aktu ne'e hasoru lezada.

Tuir mai iha 18 Dezembru 2021, iha oras tuku 18:30 kalan, arguidu dudu rabat lezada ba parede, hafoin arguidu tuku dala neen iha lezada nia kanuruk, tuku dala ida iha lezada nia matan laran parte karuk no tuku dala rua iha lezada nia inus no ibun, arguidu nia aktu ne'e rezulta lezada sofre moras maka'as no mean iha kanuruk, bubu iha matan, mean no loke la di'ak, moras iha ibun no raan sai iha inus. Iha 19 Dezembru 2021, iha oras tuku 7:00 dadeer, Polísia ba tula lezada hodi ba halo tratametnu iha Sentru Saúde Comoro maibé la junta relatóriu médiku. Antes agresauun ne'e, arguidu ho lezada diskute malu kona-ba arguidu nia bin telefone arguidu, maibé lezada mak hatan fali.

Prokuradór akuza arguidu kontra artigu 154 KP kona-ba krime maus-tratus ba kónjuje ho moldura penál tinan 2 too tinan 6 konjuga ho artigu 2, 3 (a) no artigu 35 (a) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu iha akuzasaun, arrepende nia hahalok no promete sei la komete tan krime hanesan iha futuru.

Alende ne'e lezada kontinua konfirma faktu hotu iha akuzasaun no deklarasaun mós katak di'ak malu ona ho arguidu no sei kontinua hela hamutuk.

Alegasaun finál

Prokuradór haktuir katak arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e husu ba tribunál atu konena arguidu ho pena prizaun tinan 3 suspende ba tinan 3.

Entretantu defeza husu ba tribunál atu kondena arguidu ho pena multa ho konsiderasaun katak arguidu konfea, arrepende nia hahalok no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu komete duni krime maus-tratus ba kónjuje hasoru lezada tuir konfisaun arguidu nian nomós konfirmasaun husi lezada. Bazeia ba faktu provadu sira ne'e tribunál konklui prosesu ne'e no kondena arguidu ho pena prizaun tinan rua suspende ba tinan hat fulan neen.

8. Krime arma proibida

Nú. Prosesu	: 0254/20 DICMR
Kompozisaun Tribunál	: Koletivu
Juís	: Dra. Albertinha Neves, Dra. Maria Solana no Dr. Afonso Carmona
Prokuraór	: Dr. Antonio Tavares
Defensór	: Dr. Manuel Exposto
Desizaun	: Absolve

Iha 30 Juñu 2023, Tribunál Judisiál Primeira Instánsia Dili prezide julgamentu leitura akordaun ba krime arma proibida ne'ebé envolve arguidu Renaldo Ribeiro Mota hasoru Estadu RDTL, iha Munisípiu Dili.

Akuzasaun prokuradór

Prokuradór akuza katak iha 5 Juñu 2020, iha oras tuku 4 lokraik, iha Akademia Polísia Comoro nia oin, polísia sira halo pasa-rebista ba motorizada sira no konsege halo pasa rebista ba arguidu nia motorizada Meo-beat tanba arguidu la uza kapasete, iha pasa rebista ne'e polísia sira mós hetan bala musan ida iha arguidu nia motorizada nia bolsu oin.

Prokuradór mós akuza arguidu katak arguidu ema sivil ida ne'ebé laiha lisensa atu lori tuir ka rai monisoens sira ne'e maibé arguidu hakarak lori no rai iha nia motorizada.

Prokuradór akuza arguidu kontra artigu 211 nú. 1 no 3 KP kona-ba arma proibida ho moldura penál tinan 2 too tinan 6.

Produsaun ba aprova sira

Iha julgamentu, arguidu deklarata katak loos duni motorizada refere arguidu nia bin nian no sira baibain uza troka malu, dala ruma mós arguidu nia família no kolega sira empresta no uza motorizada refere, arguidu deklarata katak nia laiha koñesementu kona-ba bala musan refere no arguidu nega katak laos nia mak rai bala musan refere iha motor nia bolsu. Arguidu deklarata liután katak nungka hatene no kaer bala musan refere, keta ema seluk mak rai bala musan refere iha arguidu nia motor nia bolsu oin maibé arguidu deklarata la hatene no nungka rai bala musan iha motor laran, arguidu mós deklarata katak nia bin mós laos polisia ka forsa F-FDTL, arguidu deklarata katak iha família polisia maibé família sira ne'e nungka ba empresta arguidu nia bin nia motor.

Testemuña ajente Polisia Julio Maia deklarata katak iha 5 Juñu 2020, bainhira sira halo pasa rebista iha Akademia Polisia Comoro nia oin ho objetivu atu asegura komunidadu sira nia movimentu tenke tau maskra no kontrola distansia sosial no iha pasa rebista ne'e testemuña sira halo pasa rebista ba arguidu nia motorizada tanba arguidu la tau kapasete no iha pasa rebista ne'e testemuña sira hetan bala musa iha arguidu nia motorizada nia bolsu oin, nune'e testemuña ho nia kolega sira prende tiha arguidu nia motorizada no bala musan refere ba entrega iha Investigasaun kriminal.

Alegasaun finál

Prokuradór haktuir katak, iha julgamentu arguidu deklarata katak iha pasa rebista ne'e polisia sira konsege hetan bala musan iha arguidu nia motor nia bolsu oin maibé arguidu rasik la hatene bala musan refere se mak tau iha motor nia bolsu oin tanbá motor refere ema barak troka-malu sae no motor refere arguidu nia bin nian no arguidu mós laos ema militar tanba ne'e prokuradór husu ba tribunál atu tetu no aplika pena ne'ebé justu ba arguidu.

Iha parte seluk defeza mós husu ba tribunál atu absolve arguidu husi krime ne'e ho konsiderasaun katak arguidu iha pasa rebista ne'e polisia sira hetan duni bala musan iha arguidu nia motor nia bolsu oin maibé arguidu rasik laiha koñesementu ba bala musan refere, motorizada refere mós arguidu nia bin nian no baibain família sira iha uma uza troka malu, tanba ne'e defeza la serteza katak arguidu mak rai bala musa refere iha motor nia bolsu. Defeza mós haktuir katak arguidu ema estudante ida nia laiha koñesimentu kona-ba bala musan refere no nungka kaer no rai bala musan.

Desizaun

Depoisde avalia faktu hotu no bazeia ba deklarasaun arguidu nian katak motoriza ne'e laos arguidu nian, maibé arguidu ninia bin nian no arguidu laiha koñesimentu kona-ba bala musan refere no baibain motorizada ne'e família sira uza troka malu nune'e halo tribunál duvida no absolve arguidu husi krime ne'e.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl